

Kontuola

ANTZUOLA / Egubakoitza / 2004eko apirilaren 23a / 198. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02

Ibarre nekazari turismo baserrian lau logela gehiago egokitu dituzte

AINZANE IRIZAR

Lau logela berri egokitu dituzte Ibarre nekazari turismo baserrian. Atzo, eguena, iluntzean egin zuten logela berrien inaugurazio ekitaldia. Hantxe izan ziren, besteak beste, herriko eta inguruko enpresetako ordezkariak eta hainbat herritar.

Zortzi logela bikoitz izango ditu aurrerantzean Ibarre nekazari turismo baserriak; hots, hamasei lagunendako tokia.

Antzuolan, ostate hartzeko aukera eskaintzen duen toki bakarra da baserri hori. Orain dela zortzi urte zabaldu zituen ateak Ibarre, lau logelarekin. Baserria berri beharra zuten, eta bide batez, negozio berri honi ekitea erabaki zuten Pilar Belastegik eta bere familiak.

Azken baten, baserriarrendako aukera berri bat da nekazari turismoa. Lo egiteko tokiaz gain, gosaria eta afaria ere ematen dute Ibarren.

BEZERO GEHIENAK, LANGILEAK

Urte osoan zehar izaten dituzte bezeroak Ibarren. Horietako gehienak herriko eta ingurueta-



Aurrerantzean, hamasei lagunendako tokia izango du Ibarre baserriak.

ko enpresetara etortzen diren kanpoko langileak izaten dira; Frantziatik eta Alemaniatik etortzen dira, batik bat.

Dena dela, Aste Santuan eta udan turistak ere etortzen dira. Pasa berri den Aste Santuko oporraldian, esaterako, beteta izan dituzte logela guztiak. Euskal

Antzuolan, ostate hartzeko aukera eskaintzen duen toki bakarra da Ibarre baserria

Herriko, Madrilgo eta Kataluniako bezeroak izan dituzte, baina hainbat italiar eta ingeles ezetz esan behar izan diote, tokiarik ez zutelako.

Hemendik aurrera, baina, arazo gutxiago izango dute Ibarrekoek, lau logela berri izango dituzte eta.

HIRIGINTZA

Kalegoi eta Sagasti kaleak lotu dituzte

Txorikua etxea eraitsi eta han geratu zen orubea aprobetxatuta, Sagasti eta Kalegoi kaleak lotzeko bidea egin dute. Eguaztenean, hilak 21, zabaldu zuten bide hori. Oraingo, baina, Kalegoitik Sagastirako noranzkoan bakarrik erabili ahal izango dugu errepidea. Aurrerago, bi noranzko izango ditu.

BUZTINZURI ERE ZABALIK

Eguen Santu egunean, bestalde, Buztinzuri kalea zabaldu zuten. Jazko irailean hasi zituzten Buz-

tinzuri urbanizatzeko lanak, eta zoru guztia berritu dute. Buztinzuritik Sagastirako bidea ere, eskola ondoan, zabalik dago, bi noranzkoetan.

Aurrerantzean, noranzko bakarra izango du Buztinzurik. Oraingo, plaza aldetik Kalegoirako noranzkoan bakarrik erabili ahal izango dugu Buztinzuri. Izan ere, Talleres Antzuola izandako eraikina berritzen dihardute, eta aldazio bereziak jarri dituzte. Gero, baina, goitik behera bakarrik etorri ahal izango da.



Eguaztena ezkerre zabalik dago Sagasti eta Kalegoi lotzen dituen bidea.

LABUR

Haur parkea jarriko dute etzi, domeka, frontoian

Urtean hainbatetan moduan, haur parkea jarriko dute. Udalak antolatuta. Etzi, domeka, arratsaldean izango da hori. Udal Pilotalekuan.

17:00etan zabalduko dute parkea, eta 20:00ak arte, nahikoa jolas egiteko aukera izango dute hara joaten diren umeek. Era guztietako jolasak egongo dira haur parkean: gaztelu puzgarriak, auto telegidatuak...

Antzuolarrak txapelkun karta txapelketan

Erretiratuen Debagoieneko karta txapelketan, Antzuolako bi bikote izan dira txapelkunak. Dolores Saiz eta Dorotea Azkargortak briska txapelketa irabazi zuten. Antonio Larreak eta Luis Mari Jauregik, berriz, puntuetan irabazi zuten.

Gipuzkoa mailan jokatzeko dute txapelketa hori; hurrengo kanporaketa hilaren 29an jokatu dute Legazpin, Urola ibarrekoen aurka.

KIROLA

PARTIDUAK

FUTBOLA

Martxoak 23

Ez da futbol partidurik jokatu Estalan. Gazteek ez dute partidurik, eta gainerakoek kanpoan jokatu dute.

EMAITZAK

FUTBOLA

La Salle 2 Antzuola 3 (Gazteak)

PILOTA

Deba Arroko txapelketa

Olalde-Aloña Mendi (nagusiak) . . . 22-15

Olalde-Arrasate (nagusiak) . . . 16-22

Olalde-Arrasate (kadeteak) . . . 22-5

KIROLAK

Berraondo finalerdietarako sailkatu da, Del Reyri irabazita

AINZANE IRIZAR

Aurreko asteburuan jokatu zuen Aritz Berraondok eskuz banakako pilota txapelketako lehenengo partidua. Del Reyren aurka jokatu zuen, eta 22-15 irabazi zion Aritzek. Horrela, finalerdietarako sailkatu da eta Leitzaren aurka jokatuko du hurrengo astean.


Lehendabiziko mailan ezin jokatu izanaren penaz, baina, animu onez ekin dio txapelketari Aritzek. Aurreko asteburuan, hain zuzen ere, jokatu zuen lehendabiziko partidua, eta finalerdietarako txartela eskuratu zuen. 22-15 irabazi zion Alberto Del Rey errioxarrari.

Iazko txapelaldunordea izanda, partidu bakarra irabazi behar izan du finalerdietara heltzeko.

Hala ere, uste baino lan gehiago egin behar izan zuen Berraondok, Del Rey mendean hartzeko. Zera esan digu Aritzek: "Nire lehendabiziko partidua zen, eta lehendabiziko partiduak beti izaten dira nekezagoak; urduritasunak ere izaten du eragina; gainera, bera bere jokoa egiten hasi zen, airez asko jokatzen du eta min egiten du".

HURRENGO, LEITZAREN AURKA

Leitza pilotari bizkaitarraren aurka jokatu beharko du finalerdietako partidua Berraondok. Partidu zaila izango dela uste du antzuolarrak: "Escuderori erraz



ARTIBOIA

Leitzaren aurka jokatuko du finalerdietako partidua Aritzek, datorren asteburuan.

irabazi zion Leitzak, eta partidu nekeza izango dut".

Txapelketa irabazteko aukeren gainean galdetuta, beti bezain

zuhur azaldu zaigu Aritz: "Ni nire jokoa egitera joango naiz, eta hala ere, ezin badut irabazi, ez da ezer gertatzen. Ikusiko dugu."



Begoña taldeko kapitain izendatu zuten taldekideek

Aurreko astelehenean hasi ziren *La flecha amarilla* lehiaketa emititzen, ETB2 katean. Hantxe ikusi ahal izan genuen Begoña Egaña antzuolarra; bi taldetan banatu zituzten lehiakideak, eta Begoña izendatu zuten bere taldeko kapitain. Ondo egin zituen, gainera, kapitain lanak, makila urdina eskuan zuela! Aurrera, Begoña, eta ea Santiagora iristen zaren!/A.I.

LABUR

Immersok erretiratuendako antolatutako bidaietarako izena emateko epea zabalik

Urtero bezala, Immersok hirugarren adinekoendako oporraldiak antolatu ditu. Hona hemen, eskaintzen dituzten aukerak: penintsulan edo Balear irletan, 15 edo 8 eguneko egonaldiak; Kanariar irletan, 8 eguneko egonaldiak; Portugalen, 8 eguneko egonaldiak; kultur ibilaldiak eginez, 6 eguneko irteerak; natura turismoa egiteko, 5 eguneko irteerak.

Informazio gehiago nahi dutenek eta oporraldietarako izena eman nahi dutenek, udaletxeko gizarte zerbitzuetara jo dezakete, maiatzaren 7a baino lehen.

Udalak bultzatutako etxebizitzetara eman diete lehenengoz okupatzeko baimena

Gaur, egubakoitz, Udalak bultzatutako etxebizitzetara lehenengoz okupatzeko baimena emateko zen Udala. Behin baimen hori emanda, jabekideak eskriturak sinatzeko eta salerosketa egiteko moduan egongo dira.

Azkeneko aldi honetan, etxebizitza multzo bakarrean hama sei etxebizitza egin ditu Udal Etxegintzak, Sagasti auzoan. Aurretik, beste bi etxebizitza multzo bultzatu zituen Udalak, Sagasti auzoan bertan. Denetara, 48 etxebizitza egin ditu Udal Etxegintzak azkeneko urteotan.

Mañarieta auzoko urbanizazio lanak amaitzear daude, ondoko garajea botata

Aurreko asteko eguaztenean eraitsi zuten Mañarieta auzo berriaren alboan aurreko etxebizitzari itsatsita zegoen garajea. Udaleko arduradunen esanetan, arau subsidiarioetan aspalditik aurrez ikusten zuten eraikin hori eraistea. Orain, Mañarieta auzoko urbanizazio lanak behar bezala egin ahal izateko, arau subsidiarioek aurrez ikusten zutena bete egin dute.

Gauzak horrela, laster joan ahal izango dute etxebizitza berri horietara bizi izatera jabekideek. Hamahiru etxebizitza egin dituzte, guztira, Mañarietan; Petxanima izeneko elkartea sortu zuten horretarako hainbat herritarrek.

Emakume Ausartak antzerki taldearen emanaldia maiatzaren 7ra atzeratu dute

Udalak etxez etxe banatu ohi duen kultura egitarauan, apirilaren 30erako zegoen iragarrita Emakume Ausartak antzerki taldearen *Un busto al cuerpo* antzezlan. Azkenean, baina, atzeratu beharra izan dute, eta maiatzaren 7an izango da.

Gaur egungo gizartean gorputzak eta itxura fisikoak duen garrantziaren gainekoa da antzezlan. Hiru belaunalditako hiru emakume dira protagonistak; hirurendako da arazo iturri euren gorputza, eta emakumeetako batek gorputzean hainbat aldaketa egitea erabakiko du.

Anje Duhalderen kontzertua izango dugu, 'Iparraldea bertan' programaren barruan

Debagoieneko Mankomunitateak abian jarritako kultura egitasmoa da *Iparraldea bertan*. Egitasmo horren helburua da Iparraldearen eta Hegoaldearen arteko zubiak eraikitzea. Euskal Kultur Erakundearekin elkarlanean antolatu ditu ekitaldi horiek Mankomunitateak.

Gauzak horrela, hainbat kultura ekitaldi egongo dira Debagoieneko herrietan; Antzuolan, Anje Duhalde musikariaren emanaldiaz gozatzeko aukera izango dugu. Datorren asteko zapatuan, maiatzak 1, izango da kontzertu hori, udaletxeko osoko bilkuren aretoan, 22:00etan. Bost euro ordaindu beharko da sarrera.

Elektrikako etxea laster eraitziko dute, eta hamaika etxebizitza egingo dituzte hantxe

Datorren astelehenean aurrera izango ditu enpresa eraikitzaileak beharrezko baimen guztiak, elektrikako etxea bezala ezagutzen dugun eraikina eraitzi eta hantxe etxebizitzak egin ahal izateko. Hortaz, badirudi berehala hasiko direla eraikin zaharra eraistean.

Beheko auzoa, hortaz, hazi egingo da. Gainera, eraikin berria egitearekin batera, beste hainbat aldaketa ere egingo dituzte etorkizunean auzo horretan. Orain dauden bi etxebizitza multzoen tartetik irteera egingo dute Uzarragarako zubiaren aldera. Horrela, auzo barruko zirkulazio arazoak konpondu nahi dituzte.